

# WACANA 110 //

LAPORAN: NOOR AINULYAKIN ISHAK dan NURUL HUDA HUSAIN • FOTO: ROSLI TALIB

# GST perlu dikembalikan

**S**etahun setelah kerajaan Pakatan Harapan (PH) mentadbir negara, rakyat sudah memberi pelbagai maklum balas awal terhadap pemerintahan PH. Kini memasuki tahun kedua, rakyat mahu melihat pula perancangan dan pentadbiran yang lebih positif dilakukan PH. Namun ia bukan mudah, maka ada cabaran dan perancangan untuk masa depan negara harus dilakukan. Apakah yang patut dilakukan untuk memastikan rakyat memberi kepercayaan kepada kepimpinan kini dan memastikan masa depan Malaysia lebih baik?

Wacana Sinar Harian kali ke-110 membawakan tajuk Setahun PH: Cabaran dan Masa Depan Malaysia yang menampilkan ahli panel Pensyarah Kanan Pusat Pengajian Perangsaaraf Media dan Informasi Universiti Teknologi Mara (UiTM), Dr Noor Nirwandy Mat Noordin; Pensyarah Kanan Fakulti Pengajian Pendidikan Universiti Putra Malaysia (UPM), Dr Mohd Murshid Arshad dan Pensyarah Kanan Fakulti Ekonomi dan Pentadbiran Universiti Malaya, Dr Muhammad Asri Mohd Ali. Sementara itu, Pensyarah Kanan Komunikasi Universiti Putra Malaysia, Dr Syed Agil Al Sagoff bertindak sebagai moderator. Ikuti kupasannya.

## Pandangan Dr Muhammad Asri Mohd Ali

**SISTEM** cukai barang dan perkhidmatan (GST) perlu dikembalikan untuk mewujudkan kesejahteraan ekonomi negara secara menyeluruh.

Bagaimana untuk wujudkan

kesejahteraan ekonomi secara keseluruhan sedangkan kebolehan dan kapasiti kerajaan banyak bergantung kepada pendapatan GST itu sendiri.

Apabila kerajaan yang baharu menarik balik dan membatalkan GST, kita semua tahu hasil kerajaan menguncup. Sebelum itu, RM40 bilion lebih diperoleh

tetapi apabila cukai jualan dan perkhidmatan (SST) diperkenalkan, kita kehilangan RM20 bilion.

RM20 bilion ini satu angka yang besar. Bagaimana dengan pendapatan yang berkurangan ini kerajaan dapat mewujudkan kesejahteraan ekonomi kepada generasi kita akan datang?



Perkara ini menjadi persoalan yang cukup besar begitu juga dengan pengurusan institusi kita yang lain.

Sejak 2008 kita dengar rangka untuk kurangkan kos sara hidup serta debat berkenaan dengan memberi pendidikan percuma kepada rakyat. Ketika ini masih lagi berlegar video yang ditularkan beberapa pemimpin tertentu yang bercakap tentang pendidikan percuma yang akan diberikan apabila mereka menang.

Tetapi malangnya apabila setahun membentuk kerajaan, isu

itu tenggelam begitu sahaja.

Berbalik kepada GST, satu dunia menganggap ia adalah sistem cukai yang sistematik dan diterima pakai oleh banyak negara di dunia ini.

Kalau kerajaan boleh *U-Turn* dalam beberapa polisi dalam beberapa projek mega, kenapa tidak bagi GST. Saya rasa kerajaan kalau hendak ke depan, sistem GST perlu dikembalikan.

Ini kerana di situ lah punca pendapatan yang kerajaan boleh salurkan untuk banyak program kesejahteraan ekonomi kepada rakyat di negara ini.

## Belia harus jadi sebahagian rakan pembangunan negara

### Pandangan Dr Mohd Mursyid Arshad

**SUDAH** tiba masanya golongan belia dibawa ke depan untuk menjadi sebahagian rakan pembangunan negara dan tidak lagi bertindak sebagai pengikut semata-mata.

Kalau hendak lihat masa hadapan, kita kena lihat belia hari ini. Jadi cabaran di sini adalah bagaimana kita cuba untuk memberikan mereka peluang dan menyerlahkan potensi mereka supaya mereka tidak berasakan berada pada tahap yang tidak matang. Jadi, kalau lihat kepada dasar yang dirangka sebelum ini sejak tahun 2015 ialah Dasar Belia Malaysia 2015.

Dasar Belia Malaysia telah meletakkan bahawa umur belia diturunkan dari 40 hingga 30. Banyak bantahan dan sebab kenapa ia diturunkan.

Had mengundi juga dicadang diturunkan daripada 21 tahun kepada

18 tahun. Jadi sebenarnya kedua-dua elemen yang kita kupas ini adalah penurunan had umur belia dan penurunan had umur mengundi, ia satu pengiktirafan sebenarnya.

Kalau kita lihat satu pengiktirafan kerajaan kepada belia menunjukkan bahawa belia ini sebenarnya sudah sampai ke tahap kematangan yang tinggi.

Secara tidak langsung kita akan membantu mereka menyerlahkan identiti. Kalau kita tengok belia yang berumur 15 hingga 18 tahun iaitu kategori kelompok belia awal, sebenarnya mereka masih mencari identiti.

Jadi kita memberikan pengiktirafan begini supaya kita dapat mempercepatkan proses mereka mencari identiti dan disebabkan itu wujudnya cadangan untuk menurunkan had umur mengundi.

Di negara serantau ini kita lihat hanya dua negara yang masih mengekalkan had umur mengundi masih 21 tahun iaitu Malaysia dan Singapura.



## Media baru jadikan rakyat berani bersuara

### Pandangan Dr Noor Nirwandy Mat Noordin

**PERANAN** media baru seperti media sosial membuatkan masyarakat lebih teruja untuk ikuti perkembangan politik, sosial dan semasa kerana manusia ada satu rangkaian komunikasi untuk mereka bersuara dan lontarkan pendapat. Justeru, mereka cenderung untuk menggunakan media sosial sekiranya dapat peluang tersebut.

Jadi ini merupakan satu peralihan yang akan sampai ke kemuncaknya, dan zaman kemuncak telah berlaku dan ia akan jadi lebih mudah apabila mereka merasakan keterlibatan mereka dalam media sosial terutama dalam isu politik diterima oleh persekitaran.

Contoh ketika zaman awal media sosial dahulu, mereka mendo-minasi faktor berhubung perbincangan politik, faktor interaksi masyarakat adalah kecil melalui ruang yang diberikan untuk suarakan pendapat kerana sukar diperoleh oleh masyarakat biasa.

Tetapi dengan adanya platform media sosial dapat dilihat keterlibatan

mereka lebih luas untuk berkomunikasi dan memberi komen dalam sesuatu ruangan terutama melibatkan isu ekonomi, politik dan semasa lebih besar.

Ia memberikan mereka peluang melihat dimensi baru kerana sebelum ini mereka hanya menjadi seorang peserta pendiam dan kini sebagai peserta aktif. Era berubah kini, daripada peserta aktif kepada orang yang mencorakkan apa bentuk perbincangan terutama dalam isu politik. Ini sebenarnya yang sedang berlaku di negara kita. Kita lihat juga media sosial mempengaruhi corak pemikiran di masa akan datang.

Selain itu, dari segi konteks keselamatan, kerajaan PH harus memantau media sosial dengan lebih sistematis kerana pada masa ini kewujudan ekstremis bermula daripada media sosial berdasarkan insiden yang berlaku sebelum ini seperti di Christchurch, New Zealand dan Sri Lanka.

Polisi perlu diperkemaskan agar data keselamatan dapat dinaik taraf bagi memantau golongan radikal ini dan mengekangnya dari awal kerana tindakan perkemas dasar tersebut tidak bertanggungjawab dengan hak asasi.

